

## Morning Dogri (NSD) National News Bulletin 13-06-2024

### आकाशवाणी

- प्रधानमंत्री नरेन्द्र मोदी होर कल लगने आले जी-7 शिखर सम्मेलन च हिस्सा लैने लेई अज्ज ईटली दे अपेलिया लेई रवाना होंगन।
- बीजेपी दे लीडर पेमा खांडू होर अज्ज अरुणाचल प्रदेश दे मुख्यमंत्री दे तौर पर सगंध चुकगंन।
- कुवैत च इक अपारमेंट च अग्न लगने आली घटना च तकरीबन 40एं भारतीयें दी मौत होई गई ऐ ते 50 जनें घायल होई गे न। प्रधानमंत्री मोदी होरें मरने आलें दे परोआर आलें गी दो-दो लक्ख रपे दी फौरी सहायता देने दी घोषणा कीती ऐ।
- भारत दी बक्ख-बक्ख खुदरा मँहगाई दर मई 2024 च इक बरे च सब्बने कोला झीगड़ी 4.75 फीसदी पर आई गई ऐ।
- आईसीसी मर्दे दे टी-20 विश्व कप क्रिकेट च भारत नै अमरीका गी 7एं विकटें कन्नै हराइयै सुपर-8 च प्रवेश पाई लैता ऐ।

<><><><><><>

### PM-G-7

प्रधानमंत्री नरेन्द्र मोदी होर कल जी-7 शिखर सम्मेलन च हिस्सा लैने लेई ईटली दे अपूलिया लेई अज्ज रवाना होआ करदे न। विदेश सचिव विनय कवात्रा होरें नमीं दिल्ली च समाचार माध्यमें गी जानकारी दिंदे होई आखेआ जे शुक्रवारें होने आले सम्मेलन लेई भारत गी इक आउटरीच मुख्खै दे तौर पर साददा दित्ता गेआ ऐ। लगातार त्री बारी औहदा संभालने मगरा प्रधानमंत्री हुंदी एह विदेश दी पैहली यात्रा ऐ। उनें आखेआ जे एह दौरा जी-7 शिखर सम्मेलन च मजूद दुनिया दे लीडरें कन्नै गल्लबात दा मौका ऐ। जेहदे च भारत ते कुल संसारी दक्खन दे महत्वै आले मसलें पर सोच बचार कीता जाग।

<><><><><><>

## Arunachal-CM

बीजेपी दे लीडर पेमा खांडू होर अज्ज अरुणाचल प्रदेश दे मुखमंत्री दे तौर पर सगंध लेंगन। सगंध चुकने आला समारोह बडलै 11 बजे ईटानगर च दोरजे खांडू कन्वेशन सेंटर च लगोग। श्री खांडू होरें कल राजभवन च गवर्नर लैफ्टिनेंट जनरल के.टी.पारनिक हुंदे कन्नै मुलाकात कीती ही ते नमीं सरकार बनाने दा दावा पेश कीता हा। मगरा गवर्नर होरें उनेंगी नमीं सरकार बनाने दा साददा दित्ता हा। कल एहदे कोला पैह्ले श्री खांडू होरें गी केन्द्री निगरान रवि शंकर प्रसाद ते तरुण चुग हुंदी मजूदगी च बीजेपी दे विधायक दल दा इक राय कन्नै लीडर चुनी लैता गोआ हा। केन्द्री मंत्री अमित शाह, बीजेपी दे अध्यक्ष जे.पी.नड्डा ते पार्टी दे महासचिव नीएल संतोष होर सगंध चुकने आले प्रोग्राम च शामिल होंगन।

<><><><><><>

## PM-Kuwait

विदेश मंत्रालय नै आखेआ ऐ जे कुवैत दे मागफ च मजूरें दी रिहायशआली थाहर अगग लगने आली घटना च तकरीबन 40एं भारतीयें दी मौत होई गई ऐ ते 50 जनें घायल होई गे न। राष्ट्रपति दफतर कुवैत दे मुत्तलका प्रशासन ते कंपनी कोला पूरा ब्यौरा लै करदा ऐ। मंत्रालय नै आखेआ ऐ जे घायलें गी 5एं सरकारी अस्पतालें च दाखल कराया गेदा ऐ। उंदा लोडचदा इलाज कीता जा करदा ऐ। अस्पताल दे मताबक घायलें च मते सारें दी हालत स्थिर ऐ। घटना दे मगरा कुवैत च भारत दे राजदूत आदर्श सवायकाहोर तुरत घटना आली थाहर पुज्जी गे। उनें भारतीय नागरिकें दी भलाई लेई अस्पतालें दा बी दौरा लाया। भारतीय राजदूती दफतर नै लगातार मकामी प्रशासन कन्नै राबता बनाए दा ऐ। प्रधानमंत्री नरेन्द्र मोदी होरें नमीं दिल्ली च अपनी रिहायश थाहर कुवैत च अगग लगने आली दुखदाई घटना बारे इक जायजा बैठक दी अध्यक्षता कीती। प्रधानमंत्री होरें इस हादसे पर दुख जाहर कीता ते मरने आलें दे परोआर आलें कन्नै संवेदना प्रकट कीती। उनें घायलें दे तौले बल होने दी कामना बी कीती। प्रधानमंत्री होरें पीड़ितें गी सब्बै मुमकिन सहायता उपलब्ध कराने दे निर्देश दित्ते। उनें विदेश राज्यमंत्री कति वर्धन सिंह होरें गी तुरत कुवैत जाने दे निर्देश दित्ते ते राहत उपाएं ते मृतक लोकें दे अवशेषें गी वापस मुख्य आनने दा कम्म करने लेई आखेआ। प्रधानमंत्री होरें मरने आलें दे परोआर आलें गी प्रधानमंत्री राहत फंड चा दऊं-दऊं लक्ख रपे दी फौरी सहायता देने दी घोषणा कीती ऐ।

<><><><><><>

## IMD

भारतीय मौसम विभाग नै जम्मू कश्मीर दे जम्मू संभाग, उत्तराखंड, पंजाब, हरियाणा, चंडीगढ़, दिल्ली, मध्यप्रदेश, राजस्थान, हिमाचल प्रदेश ते ओडिशा च अगले त्रै-चार दिनें तोड़ी गर्मी दी लैहर बरकरार रौहने दी पेशगोई कीती ऐ। मैहकमे दा आखना ऐ जे दक्खन-पच्छमी मानसून दे होर अगड़े बघने कन्नै अगले 2-3 दिनें तगर ओडिशा दे किश हिस्सें, आंध्रप्रदेश दे समुंद्रै कन्नै लगदे इलाके ते उत्तर पच्छमी बंगाल दी खाड़ी दे इलाके च गर्मी थमां राहत थोई सकदी ऐ। तोआई पच्छम बंगाल दे उप-हिमालयाई इलाके, सिक्किम ते पूर्वोत्तर भारत च अगले 4-5 दिनें दरान भारी बरखा दी पेशगोई कीती गई ऐ। दिल्ली च कल बद्धोबद्ध तापमान 44.7 डिग्री सैल्सियस रिकार्ड कीता गेआ।

<><><><><><>

## Inflation

मुख्य च प्रमुख खुदरा चीजे दी मेंहगाई दर घटियै इस बरे मई च 4.75 फीसद पर आई गई। सांख्यिकी ते कार्यक्रमें दी अमलावरी सरबंधी मंत्रालय दे आंकड़े मूजब पिछले म्हीने अप्रैल च उपभोक्ता मूल्य सूचकांक मेंहगाई दर 4.83 फीसद ही। पिछले म्हीने प्रमुख खुदरा चीजे दी मुद्रास्फीति दर मई 2023 दे बाद सब्बने थमां घट्ट ऐ ते मार्च 2024 थमां शुरू होआ। लगातार त्रिये म्हीने च 5 फीसद अंक थमां हेठ ऐ।

<><><><><><>

## US

अमरीकी फेडरल रिजर्व नै ब्यानद र च कोई बदलाव नेई कीता ऐ पर सारत दित्ती ऐ जे मेंहगाई थमां बचने आस्तै हुन थमां लेइयै बरे दे खीरै तगर इक बारी कटौती होई सकदी ऐ। फेडरल रिजर्व दे बड्डे अधिकारिणं दी 2 दिनें दी बैठक मगरा एहदी घोषणा कीती गई ऐ। लगातार 7मीं बैठक मगरा घट्टोघट्ट ब्याज दरां 5.25 फीसद ते 5.50 फीसद बश्कार रेई।

<><><><><><>

## IIP

इस ब'रे अप्रैल च मुख्य दे औद्योगिक उत्पादन सूचकांक च पिछले ब'रे दे अप्रैल म्हीने दी तुलना च 5 फीसद दा बाद्धा होआ ऐ। अप्रैल 2023 च औद्योगिक उत्पादन दर 4.6 फीसद ही। सांख्यिकी ते कार्यक्रम दी अमलावरी सरबंधी मंत्रालय दे आंकड़े मूजब इस ब'रे अप्रैल च खनन क्षेत्र च वृद्धि दर अप्रैल 2023 दे मकाबले च 6.7 फीसद मती रेई ऐ।

<><><><><><>

## IMF Srilanka

अंतर्राष्ट्रीय मुद्रा कोष नै श्रीलंका आस्तै विस्तारित दोहार सुविधा दी दूई समीक्षा गी मंजूरी देई दित्ती ऐ। सोशल मीडिया प्लेटफार्म एक्स पर श्रीलंका दे विदेश मंत्री अली साबरी होरें आखेआ जे मुद्रा कोष बोर्ड दा अनुमोदन श्रीलंका सरकार दे आर्थिक सुधार सरबंधी जतनें दा प्रमाण ऐ। पिछले ब'रे मार्च च अंतर्राष्ट्रीय मुद्रा कोष नै श्रीलंका आस्तै 48 म्हीनें च 2 अरब 90 लक्ख डॉलर दा पैकेज मंजूर कीता हा।

<><><><><><>

## Israeli Military

इजराइली सेना नै पुष्टी कीती ऐ जे औने आले दो दिन पैहले दक्खनी लेबनान च हवाई हमले च वरिष्ठ हिज्बुल्लाह कमांडर सामी तालेव अब्दुल्ला गी मारी मकाया ऐ। सेना नै इक ब्याने च आखेआ ऐ जे सामी अब्दुल्ला हिज्बुल्लाह दी नस्र युनिट दा कमांडर ऐ। लेबनानी मीडिया नै बी अब्दुल्ला दी मौत दी पुष्टी करदे होई आखेआ जे हमले च त्रै होर लोक मारे गे ते 10 घायल होए न।

<><><><><><>

## ICC World Cup

मर्दे दे आईसीसी टी-20 विश्व कप क्रिकेट दे कल रातीं न्यूयार्क दे नस्साउ काउंटी अंतराश्ट्रीय स्टेडियम च खेड्डे गेदे इक मैच च भारत नै अमरीका गी 7एं विकटें कन्नै हराई दित्ता। इस जित्त दे कन्नै गै भारत सुपर-8 च अपनी थाहर पक्की करी लैती ऐ। अमरीका नै बल्लेबाजी करदे होई 110 रंज बनाए। अमरीका आस्तै नीतिश कुमार नै 23 गेंदें पर सब्बने शा मते 27 रंज बनाए। भारत दी तरफा अर्शादीप सिंह नै 4 विकटां लैतियां। 111 रंज दे लक्ष्य दे परते च भारत दी शुरूआत खराब रेई। अमरीका दे तेज गेंदबाज सौरभ नेत्रावलकर नै अपने शुरूआती ओवरें च गै अज्ज इक चैंपियनशिप दे दऊं मैच खेड्डे जांगन। पैहले मैच च एल्ले वेस्टइंडीज दा मकाबला त्रिनिदाद दे ब्रायन लारा स्टेडियम च न्यूजीलैंड कन्नै जारी ऐ, जिसलै जे दुआ मकाबला संजा किंग्सटाउन च बंगलादेश ते नीदरलैंड बश्कार होग। एल्लै चला'रदे मैच च पैहले बल्लेबाजी करदे होई वेस्टइंडीज नै 20एं ओवरें च 149 रंज बनाए जेह्दे परते च न्यूजीलैंड नै जित्त लेई लोडचदे 150 रंजें दे लक्ष्य दा पिच्छा करदे होइ खबरा लिखे जाने तगर ....ओवरें च ....विकटें दे नुक्सान पर .....रंज बनाई लैते दे हे।

<><><><><><>

## Tennis

भारत दे यूकी भाम्बरी ते उंदे जोड़ीदार फ्रांस दे अल्बानो ओलिवेटी स्टटगार्ट ओपन टेनिस प्रतियोगिता दे डबल्स सैमीफाइनल च पुज्जी गे न। इस जोड़ी नै फ्रांस दे थियो एरीबेज ते सादियो डॉम्बिया दी जोड़ी गी सिद्धे सेटें च 6-3, 6-2 कन्नै हराया। हुन यूकी भाम्बरी ते अल्बानो ओलिवेटी दा मकाबला बेन्यामिन हसन ते डेनियल मासूर ते जूलियन कैश ते रोबर्ट गै लोवे बश्कार मैच दी विजेता जोड़ी कन्नै होग।

<><><><><><>